

Santo di Dia

Luz den scuridad

El nacimiento di Juan Bautista

RIBA 24 di juni, e calendario liturgico di Iglesia Catolico ta celebra un di e figuranan mas remarcabel den historia di Salbacion: San Juan Bautista. Mientrastanto cu hopi di e Santonan ta ser celebra riba e fecha di nan morto, Juan ta un excepcion. Su fiesta ta marca su nacimiento, un evento cu a carga un importancia profetico y cu a prepara e caminda pa e binida di Hesucristo mes.

E nacimiento di Juan no tabata un suceso ordinario. Ta describi den e Evangelio di Lucas con su mayornan, Zakarias y Elisabet, tabata di edad avansa y sin yiu. Elisabet tabata steril, un situacion cu den e tempo ey tabata mira como un señal di desaprobacion divino. Pero Dios tabatin un plan diferente. Un angel a aparece na Zakarias, un sacerdote y a anuncia cu lo nan haya un yiu y cu e yiu aki lo ta yena cu Spirito Santo for di su matriz y lo a prepara un pueblo pa Señor. Zakarias, den su duda, a keda mudo te na e nacimiento di Juan.

E nacimiento di Juan Bautista ta un rayo di speranza den un mundo cu tabata spera ansiosamente e Mesias. Su Tata, Zakarias, despues di e nacimiento di Juan y di a skirbi su nomber riba un tabla, a recupera su bos y a pronuncia un alabansa profetico cu a reconoce Juan como e profeta cu lo a bay dilanti di Señor pa prepara su caminda. Esaki ta e Cantica di Zakarias, conoce como e "Benedictus," cu ta ser recita tur mainta den e Liturgia di Oracion.

Juan a crece y a biba un bida humilde



den desierto, bisti cu lana di camel y comiendo dalacochi cu miel salvahe. E tabata un predicado fuerte cu a yama e pueblo na repentimento y bautismo pa pordon di nan pica. Su mensahe tabata directo y sin compromiso y e tabata un profeta cu a papia e berdad na tur, incluyendo Herodes, e rey, loke finalmente a conduci na su aresto y ehecucion.

Pero mas cu su predicacion, e papel mas importante di Juan tabata esun di esun cu a musta e Mesias. Ora cu Hesus a bin pa ser batisa pa Juan den Riu Jordan, Juan a reconoc'E y a testifica: "Wak, e Lamchi di Dios cu ta kita pica di mundo!" E tabata e ultimo di e

profetanan di Testament Bieu y esun cu a conecta e promesa di Dios cu e cumplimento den Hesus.

Awe, celebrando e nacimiento di San Juan Bautista, nos ta corda su curashi, su humildad u su dedicacion inkebrantabel na Dios. Su bida ta un inspiracion pa nos tambe, pa nos ta bos pa e berdad, pa nos prepara nos mes y otronan pa un encuentro cu Cristo y pa nos sirbi como guia humilde cu ta musta semper na e "Luz di Mundo."

Su fiesta ta un recuerdo cu tur bida tin un proposito divino y cu tur di nos por ta instrumento den e man di Dios pa trece Su reino cerca.